

# LA USC DI LADINS - VENERDI' 5 FEBBRAIO 2021

TRADIZIONS

## Carnascèr sa Vich

*L Comitatz manifestaziuns  
à endrezà trei  
scomenzadives culturèles  
per cognoscer miec la  
tradiziuns fascènes*



*La ciasetes sui festii de Vich è states fornides coi simboi del Carnascèr fascian.*

Ence chest an l'è ruà l temp de Carnascèr. N temp che per solit ne envia a se goder, a jir en mèscra, a mascherèda. Purampò l'emergenza sanitàera no é amò fenida e coscita tel respet de la regoles se cogn bele vardèr de no creèr massa ocajions de contat e de sparpagnament del virus.

L Comitatz manifestaziuns de Vich, con a cef la presidenta Daniela Cigolla, se à pissà che fossa stat bel endrezèr istesc vèlch per l temp de Carnascèr e coscita fin ai 28 de firé l'è stat metù a jir trei scomenzadives culturèles.

Prum de dut, desche l'an passà, la ciasetes sui festii che tel temp de

Nadèl è states fornides con la cripeles, ades les ciaparà vita e color con i simboi tradizionèi del Carnascèr. Doudesc ciasetes rencurèdes da sociazions, privac e scoles, fora per dut l paisc che ne portarà a descorig mèscres e faceres fascènes. Te ogne ciaseta se pel troèr vèlch particulèr enteressant e gustegol. Se pel



domanèr la mapa te ofize turistich de Vich o se la descìarièr online dai canai social. Sarà più sorì coscita ge jir dò al percors. Amò ogne mèrtesc e vender da les 17.00, ensema a n compagnador da mesa mont, se podarà jir a descorig i ciantons più scone del paisc. A la fin de la raida se pel se fèr cater ciacoles tedant a

n bon aperitif. Prenotaziuns te ofize di foresc de Vich o al numer de telefon 0462 609700. Se se vel enveze cognoscer mingol miec noscia tradiziuns da Carnascèr se pel domanèr na vijita vidèda te Museo Ladin ogne vender da les 10.00, prenotaziuns obligatories al numer 0462 760182.

MCI